



LAB sindikatuko ordezkari bat Tindouf Argelian dauden Saharar herriaren errefuxiatu eremuetan egon da Saharako UGT SARIO sindikatuaren 8. kongresuan, bertako sindikatuari eta oro har Saharar herri guztiari bere elkertasuna adierazten. Egun guzti hauetan, bertako errealitatea gertutik ezagutzeko aukera izan dugu eta harritura itzuli gara, nola hain baliabide guttirekin hainbertze gauza egin ditzazketen.

Saharar herria egoera larria pairatzen ari da. 1975. Marokok okupatu zuen eta gaur egun 3 eremuetan banatuta dago Saharar herria: alde batetik Marokok okupaturiko lurraldea, bertze aldetik askatuta eremua eta azkenik Argeliako errefuxiatu eremua.

1991ean bakea sinatu zen, erreferendum bat egiteko konpromisoarekin baina Marokoko gobernuak ez du bere hitza bete eta Europak ere deus gutti egiten du egoera hau blokeotik ateratzeko. Bitartean Saharar herria okupatuta eta errepresio gordina pairatzen bizi da.

Egon garen eremu guztietan LAB sindikatuaren konpromisoa Saharar herriaren askatasunarekin helarazi diegu bertakoei. Haien aldetik gurekiko harrera ezin hobea izan da. Egun guzti hauetan herrixka ezberdinak ikusi ahal izan ditugu eta beraien antolaketa eredia ere gertutik ezagutzeko aukera izan dugu.

Eskolak, liburutegiak, ospitaleak, ezgaituentzako zentroak, emakume eta gazte antolakundeen taldeak eta abar luze bat ezagutu ahal izan ditugu bertakoen aldetik ongi etorri beroa jaso dugun bitartean.

UGT SARIOren 8. kongresua ere bertatik ezagutzeko aukera izan genuen eta bertan ere Saharako sindikatuarekiko eta Saharar herriarekiko gure elkertasun osoa helarazi genien. Idazkari nagusi bezala hautatua izan zen Salama Brahim Bashir Eri-ri eta bere ekipoari zortarik onena opa diogu etorkizunerako, Saharar herriaren askatasunean egin beharreko bide honetan.

LAB sindikatuaren interbentzioa UGT SARIOren 8. kongresuan, Saharar errefuxiatu eremuetan, Abenduak 3, 4 eta 5ean

"Kaixo eta arratsalde on guztioi! Gure herriko hizkuntza nazionala den Euskaraz agurtzen zituztedan,

Salam alekun sukran ale stigbel

Lehenik eta behin UGT SARIO sindikatuari bere kongresura gonbidatu izana eskertu nahi genieke. Espero dugu kongresu honek Euskal Herria eta Saharar herria batzen dituen harremanak estutzeko balio izatea oraindik eta gehiago. Bertze alde batetik Kongresu hau UGT SARIOrentzat eta orokorrean Saharar herriarentzat aurrerapauso handia suposatzea espero dugu beraien askatasuna lortzeko bidean.

Euskal Herria ere estaturik gabeko herri bat da. Izana, existentzia eta libre eta demokratikoki etorkizuna erabakitzea ukatu egiten zaiona. Gure antolakundea den LAB Euskal Herriko langile klasearen zerbitzurako egoteko borondatearekin sortu zen, euskal errepublika independente bat eraikitzeko borrokan, justizia sozialean eta gizon eta emakumeen arteko parekidetasunean oinarrituko zena.

Estatuik gabeko herrietara benetako demokrazia bat iristea nahi badugu, herrietako prozesu soberanistetan pausuak eman behar ditugu; hau da, 1978ko erregimena atzean utzi behar dugu, herrien askatasun aldarriak itotzeko sorturiko erregimena hain zuzen ere.

Saharar herriaren askatasunaren alde bere bizitza eman duten guztiak gogoratuz jarraitu nahiko nuke, eta bereziki Brahim Saika burkide sindikalista.

Ezin ditugu ere ahaztu Marokoko kartzeletan bahituta dauden preso politiko Sahararrak. Euskal Herrian oso ongi dakigu hori zer den, gaur egun oraindik 350 Euskal Preso politiko baino gehiago baitaude beraien etxetik ehunka kilometrotara. Horietako bat gure Idazkari nagusi ohi Rafa Diez da, orain dela 6 urtetatik espetxean Euskal Herriarentzako bake, demokrazia eta askatasun eszenatoki baten alde lan egiteagatik.

Ez nuke bukatu nahi Saharar herriarekiko gure herriaren konpromiso osoa berretsi gabe beraien lurra eta askatasuna berreskuratzeko borroka legitimo honetan. LABen eta Euskal Herrian lagun bat daukazue.

Gora Sahara askea!

Yahia Sahara horra!"

—